

Barne Sailak ez du interesik kale borroka gelditzeko, PPren ustez

Javier Balzak, berriz, «elektoralismoa» egotzi dio Iturgaitzi

F.I. / Gasteiz

Kexu daude PPko kideak, Ertzaintzak ez omen duelako interesik kale istiluak sortzen dituztenak atxilotzeko. «Ez dago treguarik bizitza ezinezkoa egiten dutenekin. Horien aurka jardun behar da», adierazi du Carlos Iturgaitzek. Javier Balza Herrizaingo sailburuak elektoralismoa egitea leporatu dio.

HAUSNARKETA egiteko eskatu dio PPko lehendakariak Herrizaingo sailburuari. Izan ere, Iturgaitzek pentsatzen du haren sailak ez dituela ahalegin guztiak egiten kale borrokan ari direnak atxilotzeko. «Zergatik lehen atxilotetak egiten ziren, eta orain ez? Tregua dago kale borrokarentzat? Jakin nahi nuke», adierazi zuen atzo Gasteizko Legebiltzarreko prentsa aretoan, lehendakariari egin dion interpelazio baten aurkezpena aprobetxatuz.

ETak orain bost hilabete su-etena iragarri zuenetik, «ehunka» sabotaje, mehatxu eta eraso izan direla gogora ekarri zuen PPko kideak, eta hori ikusita Herrizaingo Sailak zer egiten duen galdetu zuen. Egoera horrek gizartearen «frustrazioa» dakarrela ondorioztatu zuen, halaber, Iturgaizek.

«Guztiok lasai bizi nahi



DAVID AGUILAR / EFE

Leopoldo Barreda eta Carlos Iturgaitz, atzo, Eusko Legebiltzarrean.

CARLOS ITURGAITZ

■ ■ ■ «Zergatik lehen atxilotetak egiten ziren, eta orain ez? Tregua dago kale borrokarentzat? Jakin nahi nuke»

dugu, hori eskatzen du gizarteak. Horregatik nahi dugu istiluak sortzen dituzten horiek epaileen aurrean izatea, edo kartzelan, hori baita atentatuak egiteagatik merezi duten lekua», adierazi zuen.

Javier Balza Herrizaingo

sailburuak atzo bertan erantzun zion Iturgaitzi. ETBn egindako adierazpenetan «elektoralismoa» egitea egotzi zion. «Interes politikoa eta alderdikeria dago bizi dugun hauteskunde egoeragatik», adierazi zuen. Balzak, bezperan, PPko kideei ñabartu zion, eta jakinarazi zion ez dela jendaurrean adierazi duten adinako mehatxu eta atentatu kopurua izan, gutxiago baizik. Iturgaitzek onartu zuen hala izan daitekeela, baina horrek ez duela atxilotetak egin beharra murrizten nabarmendu zion. Balzak, bestalde, adierazi du atxilotetak ez egiteko arrazoiak «asko eta konplexuak» direla eta ez zuen xehetasun gehiago eman.

CGPJk «zentsura formaltzat» jo du Legebiltzarrak Urrutikoetxea eta Etxeberriari buruz azaldu jarrerara

■ Kezkatuta agertu da Entzutegi Nazionalaren erabakiaren kontra azaldu zelako

Agentziak / Madril

KEZKA agertu zuen atzo Botere Judizialaren Kontseilu Nagusiko osoko bilkurak (CGPJ), Eusko Legebiltzarra Joxean Etxeberria eta Josu Urrutikoetxea EHko parlamentario presoak bilkuretan izatearen alde agertu zirelako. Madrilgo Entzutegi Nazionalak Legebiltzarreko Batzordeen eraketan egotea debekatu zion lehenik Etxeberria eta Urrutikoetxeari, eta ondoren otsailaren 12ko osoko bilkuran egotea ere bai.

Ondorioz, EAJ, EH eta EAK

legez besteko proposamena aurkeztu zuten bilkura horretan. Onartu egin zen proposamen hori eta bertan Entzutegi Nazionalaren jarraia kritikatzeko zen, erabakiak aipatu bi presoei euren parlamentario lana betetzea eragozten ziela esanez. Halaber, ebazpenak Legebiltzarraren borondateari eta euskal gizarteari muzin egiten diola eransteko zuten.

CGPJen ustez, Legebiltzarrak erakutsitako jarrerara «zentsura formala» izan da. CGPJak bere kezka agertzeko akordio bat onartu zuen atzo-

ko bilkuran. «Beharrezkoa ikusten dugu horrelako akordio parlamentarioen aurrean gure kezka agertzea, Botere Legegileak organo jurisdikzionalari eginiko zentsura formala dela uste dugu», zioen agiriak. Horrelako erabakiak ez datoz bat botere banaketen printzipio konstituzionalekin, CGPJk dioenez.

Kontseilua osatzen duten 21 kideetatik 18k alde bozkatu zuten. Emilio Olabarriak bakarrik bozkatu zuen kontra, eta Manuela Carmena eta Javier Moscoso ez ziren izan atzoko saioan.

Estatutua Europako egoerari egokituko zaio legealdian

■ Zenarruzabeitia lehendakariordeak hala esan du

F.I. / Gasteiz

GERNIKAKO Estatutua Europako egoerari egokituko zaio, Idoia Zenarruzabeitia lehendakariordeak Legebiltzarrean jakinarazi duenez. Izan ere, atzo berak eskatutako agerraldia egin zuen legealdirako asmoak jakinarazteko. Asmo horien artean aipatu zituen Estatutuaren egokitze prozesua, Udal Legea eta LHL Lurralde Historikoen Legearen aldaketa.

Orain hogeitaz egin zen Estatutua, Europaren erakuntzak oraingo bilakaera ez zuenean. Hori dela eta, errealitate horretara egokitzeko unea iritsi dela uste du Jaurlaritzak. Egokitzearen ezaugarria Legebiltzarrean eramango du Zenarruzabeitiak, liburu zuri baten

bitartez. Liburu horrek EAEk Espainiarekin eta Europarekin dituen harreman motak zehaztuko ditu, eta erabakiak hartzeko oinarritzko idatzia izango da.

Udal Legea legealdi honetan egingo dela iragarri zuen lehendakariordeak. Legeak jasoko ditu zertan oinarritzen den Udalen autonomia eta finantza sistema. Helburua da Udalak finantza sistema propioa izatea. Horretarako LHL legea aldatu beharko dute, eta hala izango dela ziurtatu zuen Zenarruzabeitiak. Udalek leku bat izango dute Euskal Finantza Kontseiluan. Hala ere, ez zuen argitu Jaurlaritzak eta Diputazioek duten ordezkartza izango duten finantza erakunde horretan.

EHk ez du parte hartuko diru berezien kontrolerako taldean

■ Atzo amaitu zen hautagaiak aurkezteko epea

Agentziak / Gasteiz

EUSKAL HERRITARROK taldeak ez du parte hartuko Herrizaingo Saileko diru berezien kontrolerako osatuko den azpibatzerdean. Jose Antonio Rubalkaba Institutioa eta Barne Batzordeko presidentek zazpi eguneko epea eman zuen alderdiek azpibatzerde horretarako hautagaiak aurkeztu zitzaizkion. Epea atzo amaitu zen eta talde guztiek aurkeztu dituzte

hautagaiak, EHk ezik; horretarako arrazoi berezirik ez dagoela esan dute. UAk ere ez du aurkeztu, baina IUekin batera Talde Mistoa osatzen duela eta hautagaia IUkoa delako.

Diru berezien gastua kontrolatuko duen batzordea Rubalkabak eta beste bost lagunek osatuko dute. Herrizaingo sailburuak gastuen berri eman beharko du sei hilabete behin batzorde horren aurrean, eta eskatzen dioten aldiro.



J.J. GUILLEN / EFE

Trillo eta Atutxaren arteko bilera. Espainiako Kongresuko presidentea Federico Trillo eta Eusko Legebiltzarreko lehendakari Juan Maria Atutxa Madrilen bildu ziren atzo. Kargu horiek dituztenak Madrilen bildu diren lehen aldia izan zen atzokoa; Eusko Legebiltzarrean behin izana da Trillo.